

每週經課朗誦經文(巴克禮漢羅/教羅)2013/07/21

共同經課 - 1 阿摩司書八章一節~十二節

1 主耶和華 hō我看見一項；我看見一筐夏天 ê 果子。2 伊講，阿摩司 ah，你看見甚麼？我講，看見一筐夏天 ê 果子。耶和華就對我講，我 ê 百姓以色列 ê 末期到 lah；我的確無 koh 寬恕 in。3 主耶和華講，hit 日宮殿 ê 唱歌 beh 變做啼哭；beh 有 choē-choē 身屍 tī tak 所在 hiat-kak，人 lóng 靜靜。4 Lín chiah-ê ài 吞食 sòng-hiong 人，hō chit 所在 ê 困苦人衰敗 ê，tiòh 聽 chit-ê 話。5 Lín 講，月 ê 初一甚麼時過去，hō阮 thang thiò 五穀？安歇日甚麼時過去，hō阮 thang 賣麥，用細 ê i-hoat，用重 ê sià-khek-lék，用詭詐 ê 天秤來騙人；6 thang 用銀買 sòng-hiong 人，用一雙鞋換窮赤(kêng-chhiah)ê 人，將 phái" ê 麥賣 hō人？7 耶和華 kí 雅各 ê 榮華來 chiù-choā 講，In lóng 總 ê 所做，我永遠無 boē 記得。8 Chit-ê 地 kiám 無 beh 因為 án-ni 來搖 choah，khiā 起 hit 中間 ê，kiám 無 beh 悲哀 mah？chit-ê 地 beh 親像大河漲起來；也 beh 振動，退低親像埃及河。9 主耶和華講，到 hit 日，我 beh hō 日頭 tī 日中晝就落去，hō 地 tī 當頭白日變烏暗。10 我 beh hō lín ê 節期變做悲哀，歌曲 lóng 變做哀歌，beh hō 眾人腰 hā 麻布，頭殼無半支毛；koh hō 伊悲哀親像死孤身 ê kiá"，到尾親像痛苦 ê 日一樣。11 主耶和華講，看 ah，日子 beh 到，我 beh hō 飢荒到 tī chit 所在，飢荒 m 是因為無餅，嘴乾 m 是為 tiòh 無水，就是因為無 thang 聽耶和華 ê 話。12 In beh 四界去，tùi chit-ê 海到 hit-ê 海，tùi tùi 北到東；走來走去，chhē 求耶和華 ê 話，亦 chhē 無。

共同經課 - 2 詩篇五十二篇

1 í-tong 人 To-ek 來報掃羅講，大衛到 A-hi-bi-lék ê 家。Hit 時大衛做 chit-ê 教示 ê 詩；交 hō 樂官。1) 勇猛 ê 人 ah，你啥事為 tiòh 做 phái" 來誇口？上帝 ê 慈愛永遠 tī-teh。2 你 ê 舌圖謀邪惡；親像內 ê 剃頭刀，行奸詐。3 你 ài phái" 贏過 ài 好；Ài 白賊贏過 ài 講義理。[Sè-láh]4 詭譎 ê 舌 ah，你 ài 講一切吞食 ê 話。5 上帝亦 beh 毀壞你，到永遠，伊 beh 掠你，對你 ê 布棚中 khiú 出來；Tùi 活人 ê 地，將你拔出來。[Sè-láh]6 義人 beh 看見來驚惶，亦 beh 笑伊，講，7 看 ah，這就是 hit 號無掠上帝做伊 ê 氣力 ê 人；是 oá 靠伊 ê 錢財 ê 罪，Tī 邪惡家己 khiā 在。8 論到我，我是親像上帝厝內青翠 ê 橄欖樹；我永永遠遠 oá 靠上帝 ê 慈愛。9 因為你行這，我 beh 感謝你到永遠；我亦 beh tī 你聖 ê 百姓 ê 面前 òng 望你 ê 名；因為伊 ê 名是好。

共同經課 - 3 歌羅西書一章十五節~二十八節

15 伊是 boē 得 thang 看見 ê 上帝 ê 像，伊是頭一個生 ê，tī lóng 總受創造 ê 事先；16 因為萬物 tī 伊來創造，tī 天裡 kap tī 地裡 ê，有 thang 看見 kap 無 thang 看見 ê，或是座位 ê，或是治理 ê，或是辦正事 ê，或是掌權 ê，萬項有 lóng 是 tùi 伊，也為 tiòh 伊，chiah 受創造。17 伊 tī 萬項有 ê 事先；萬項有 tiàm-tī 伊來 sa"-kap khiā 在。18 伊是身軀 ê 頭，身軀就是教會；伊是源起頭，tùi 死人中起來 ê 頭一個生 ê，hō 伊 tī 萬項有中做第一。19 因為父歡喜 hō 一切 ê 豐盛 tiàm-tī 伊；20 已經將伊十字架 ê 血來成就和平，就 tùi 伊 hō 萬項有 kap 伊本身 koh 再和，或是地上 ê，或是 tī 天裡 ê，lóng 是 tùi 伊。21 Koh lín 平素 tī phái" ê 所行 kap 上帝隔斷，心內做對敵，22 ta" 伊 tī 伊肉體 ê 身軀，tùi 伊 ê 死，已經 hō lín koh 再和，beh hō lín chiah-ê 成聖，無瑕疵無 thang 嫌 ê，khiā tī 伊 ê 面前；23 若 lín 長長 tiàm-tī 信，有地基 koh 堅固，無受搖動，來離開福音 ê òng 望，這福音就是 lín 所 bat 聽見 ê，koh 是傳 tī 天下 lóng 總受創造 ê 中間；我保羅已經設立做伊 ê 差用。24 Ta" 我為 tiòh lín 受 chiah-ê 艱苦是歡喜；我為 tiòh 基督 ê 身軀就是教會，tī 我 ê 肉體，補滿伊所未有盡 ê 患難；25 我設立做 chit-ê 教會 ê 差用，照上帝為 tiòh lín 所交付我 ê 職份，來完滿上帝 ê 道理，26 就是萬世萬代以來所 khng 密 ê 奧妙；ta" 已經顯明 tī 伊 ê 聖徒；27 上帝 ài beh hō in 知 chit-ê 奧妙 ê 榮光 tī 外邦中有 joā 富有，就是基督 tiàm-tī lín，做榮光 ê òng 望 ê；28 阮傳伊，用 tak 樣 ê 智慧苦勸 tak 人，教示 tak 人，beh 獻 tak 人 tiàm-tī 基督來完全。

共同經課 - 4 路加福音十章三十八節~四十二節

38 In 行 ê 時，耶穌入一個鄉社；有一個婦人人，名 Má-tāi，接納伊 tī 伊 ê 厝。39 伊有一個姊妹，叫做馬利亞，坐 tī 主 ê 腳下，來聽伊 ê 話。40 Má-tāi 因為接待 in，tāi-chì choē，心忙；就近耶穌講，主 ah，我 ê 姊妹放我家己 teh 摸，你無要緊 mah？Tiòh kah 伊來贊我。41 但是主應講，Má-tāi ah，Má-tāi ah，你為 tiòh choē-choē tāi-chì 掛慮紛雜；42 但是所欠用 ê 是一項 nā-tiā"；因為馬利亞已經揀 tiòh 好 ê 份額，就是 boē kā 伊搶得 ê。